

1 4  
1777  
14






寓



集





門 44  
號 1777  
卷 14

寓庵集卷一

早稻田大學圖書館  
33.3.31  
藏書

寓庵集卷一



元 李 庭 撰

五言古詩

送姚德寬大使還解

維昔金運衰四海兵浩浩真人起朔方氛祲付一掃姚  
侯并門秀風雲見幾早因時正鹽筴為國佐征討雍容  
佩金節積功滿十考一心了無諍萬事但稱好著身豺  
虎羣竟以明哲保傳家有佳兒拂衣遽高蹈功成名復  
遂身退乃天道白雲既無拘青山可娛老何須訪羨門  
方寸即蓬島

題扈正之愚軒

賈誼逐以才晁錯死以智才智豈不佳反為身之累甯  
武智而愚誰能企高致顏子叡而愚卒為傳道器扈君



曠達士老練世閒事驚禽屢傷弓良醫三折臂結廬曲  
江上庭宇幽且邃勝其軒曰愚蓋以愚自戲外愚中不  
愚顏甯無以異奴耕與婢織生理足自備清風一枕眠  
明月三杯醉敝屣祿萬鍾浮雲馬干駟冥冥天際鴻仰  
觀令人愧

古詩二十一首

涉渚采春蘭蘭生不盈握我欲持贈君路遠安可託昔  
者承君恩良厚不爲薄今君在萬里音書兩冥冥我憂  
君不知我意君不察蘭葉何青青馨香隨風發安得入  
君懷爲君解煩結悠悠終莫致脈脈心不絕  
髮衰日已白形衰日已槁誰于形髮閒不隨形髮老浮  
雲日夕變青山依舊好此理非智求不在讀書早欲看  
杜陵花須上長安道  
娟娟圓月明照見我心懷明月豈不美我懷自不佳黃

河決金隄東南流入淮誰令州與縣化爲狼與豺人命  
賤如土委棄不得埋憂來望中宵北斗當空排櫓槍不  
可視默默下西階

農家初闢地日夕把犁鋤荆棘總芟刈新苗漸成區勤  
勞不自怠瘠土爲膏腴惜彼後來人不念前人劬耕耘  
付童稚倉廩隨時虛遂令禾黍場化爲榛與蕪昔以一  
人耕成此百畝居如何有百畝不能養其軀牛犢辭故  
舍華屋爲工墟牧豎不忍視落日空躊躇

蘆葉何挺挺稻葉何垂垂至寶不外眩高才恆自卑  
生白首狂甯子扣角悲胸中有所負何必常人知念彼  
輕薄兒衣冠空陸離氣隨黃金盡皇皇竟何之古來觀  
人者不輕微賤時

早起坐東軒晨風吹我衣初日出海上蒼涼無赫輝翳  
翳新木榮交交羣鳥飛禾黍蔽原野秋實已離離雖非



己所植私欣雨暘時亂離得安處貧賤何足悲

上山行采薪下山行采蘭采薪易粟歸采蘭棄草閒雖有君子心不如桃李顏方知出山賤不如長在山我欲遺所思路遠風雨寒嗟哉不能顧俯之淚汎瀾道傍華表柱下有百年墓不知何代孫伐賣墳前樹伐樹尙可忍畏官留禁步棄地與他人遺骸一朝露薄葬古所敦雖貧反能固

堂前兩株樹朱夏結層陰相看坐終日愛此歲寒心故人離亂閒寄我孤桐琴不辭涉遠道以我爲知音登山覺山高汲井知井深不經洪鑪然不識真黃金丈夫同患難方知尺與尋傷彼市塵人滄滄安足湛

荷花未出水荷葉已田田何不飄流去中有藕絲牽荷葉牽藕絲欲去不得去客子萬里行棲遲在中路豈無田與廬豈無親與故丈夫旣出門雖親弗能顧去爲人

所憐歸爲人所慕安能隨燕雀低飛度朝暮

嫋嫋秋風起撼撼庭樹鳴浮雲有涼意白日向西行路有羈旅人自言久徂征去年役交河今年戍彭城上功在幕府官職未分明長鎗不得用黃金有餘榮荆棘被原野流水不復清無官亦歸去天下何時平

遊子念故里日夕心懸懸微軀不自保遠道何當旋援琴欲撫之一撫兩絕絃蒼天一何高海水一何深山高與水深不如游子心安得雙羽翰歸飛投故林

婉婉良家子娟娟好顏色芳年不自愛誤爲鄰里識一朝入漢宮引過長楸側雖然不得憐名在宮人籍已矣復何言芳菲從此畢

蘼蕪生水濱綠葉何委蛇閒以蘭與芷被彼清江湄清江起洪流化爲濁水泥憔悴勿復道飄零渺難期所願蘼蕪草微根當自持



浩浩天地間二氣相推移流行不暫息主物迺其宜天地不生物用此將安施斯人七尺軀不與眾物齊聰明百骸具豈但食與衣晨興暨夕息凜然當自持

被髮晞朝陽棲遲陟行路春風吹百草歲月忽已暮客從海上來潔白如秋露吹笙駕鶴縹渺雲中度教我服華池令我顏色固

童子十二三汲水西澗阿水深不可汲白石生清波俯首濯雙足既行亦既歌上山采紫芝下山牽綠蘿手持一尺箠捷若猿猴過恐是黃初平驅羊下前坡我欲往詢之奈此頑劣何

幽幽山中寺釋子二三人晨興擊鐘鼓誼誼誼誼誼誼靈文齋罷各分散寂然無所聞或坐長松閒或行清澗濱采花獻佛前不喜亦不嗔山頭日未出有客來扣門自云西州士牧牛三十春問之無可言長歌下青雲

晨起坐西齋羣峯淨如寫初暘上其巔白雲在其下復有丹碧林闌斑綴原野微風披拂之庭戶亦瀟灑優游得清翫顧我何如者夢幻既非真榮枯諒成假諸緣隨所遇悠悠往蘭若

亭亭長松樹白雲護其顛飛鳥不敢下茯苓已千年蒼鼠從何來便捷不可言倏忽在其後倏忽在其前睚眦利指爪枝葉無由全念彼歲寒姿受此微物牽驅之不得去撫之徒自憐

丞相出午門大夫已來迎兄弟同一家無相猶以爭豈日無他人雖賢不如親晨出與暮歸以保我弟昆送唐括萬戶出西門

淵淵伐征鼓煌煌過丈旗將軍乘大馬劔戟行相隨吉日既就道輜重同時移送者念疇昔行人傷別離丈夫次戎旅私情何足悲勳名在多故斬伐勿愆期不驕亦



不歎堂堂乃王師勵子英妙年慰我憂虞思身輕君命  
重行矣無遲遲

⑤妙觀設醮贈王真人

散花寥陽殿琅琅振瑤音雲璈閒笙磬香煙結層陰帝  
真馭華軒鸞鶴下來臨三元慶嘉會五老書丹枕秉誠  
宣妙範流津滌中襟耀靈昭景貺信禮稽首欽

寄中峰兩道者

中峰兩道者落髮山中住不知今幾年忘卻來時路夜  
靜星斗寒獨坐長松樹欲往從之遊冥冥隔煙霧

玉淵

霍山冠河東帝遣鎮茲土其下有濫泉浩浩自太古長  
渠注町畦平地散膏乳熙熙兩縣民比屋飽秔稌傳巖  
久寂寞誰解作霖雨藉此無盡波紓爾旱歲苦飛亭噉  
洪源碧色浮棟宇昔人題玉淵無乃見其麤我將易新

名濟物功可取榜爲永賴泉萬世配神禹

此玉淵在河東

七言古詩

送麻君信之歸河東

葳蕤九苞鳳璀璨五色麟由來瑞物應圖牒千古一出  
驚時人河山蘊蓄英秀氣端爲王國生奇珍惜哉命不  
與時偶悠悠白首埋風塵愛君一何深識君恨不早東  
風二月汾水頭一見襟懷卽傾倒竭來平陽城得酒卽  
相覓亭亭玉樹倚蒹葭自愧才華非匹敵一朝送我還  
故鄉慨然相贈雲錦章到今六七年篋笥蘭蓀香不意  
春來重會面一罇未盡還相餞秋鴻社燕兩愬愬別恨  
蒼茫滿秦甸乾坤置網方彌路黃鵠高飛莫回顧煙霞  
從昔少人爭太華中條有佳處長安倦客亦思歸屈指  
秋風定拂衣一曲紫芝千古意與君分采兩山薇

上馬行



有馬有馬黃金羈公莫上馬公莫疑鸞翔虎躍日月動  
掣電驚雷神鬼奇人間靈物洞恍惚朝刷扶桑莫咸池  
只愁控御失其道古人已逝能者誰豈無王良與造父  
側立審視求其宜紛紛少年勤遠略便欲赤手驂蛟螭  
攀鞍執策不自料眾人從吏來相催翩然上馬悔莫及  
千里萬里無還期黃河流水不可度太行積雪安能馳  
疾驅前途荆棘暗卻反故步煙塵迷徒御不來天欲暮  
茫茫四顧斯何時公莫上馬公且來山中酒熟山花垂  
長衫大帽風日好輕鞋短杖春遲遲童子雖嫌行步緩  
老夫未覺精神疲流水悠悠川上過白雲漾漾天邊移  
欲往卽往歸卽歸有馬有馬他人騎  
跋支道林馬圖

納僧愛馬疑千載好事相傳入圖畫一場譏評去聲幾時  
休到底無人爲開解道人心鏡湛虛明照物何曾有留

礙等閒觀色似觀空不離前塵得三昧養生還自解牛  
悟全德或因畜雞解我今說破老師心從此披圖莫生  
怪

題商山四皓圖

出商顏定漢儲高名千古與山俱書生白首成何事枉  
著狂言穢畫圖

效鮑參軍體

蛛絲結網綠綺琴謂是絃絕無知音美人今朝拂拭去  
金徽玉軫動人心上絃別鶴下離鸞翠房便娟春日閒  
青絲白馬何當還

謝商參政惠銅雀瓦硯

左山相公清且廉惟餘好古心無饜家藏奇硯不知數  
馬肝鳳喙盈箱篋建安鄴瓦年最遠愛惜不啻黃金兼  
長鬚持贈慰衰朽以貴下賤何其謙一朝奇寶墮掌握



坐覺光彩生窮簷既不能草賦擬三都頓使洛陽紙價  
添又不能作碑福先寺要令一字酬三縑庸虛何以當  
此贈赧然愧汗衣空沾聊書鄙語報勤厚博公一笑爲  
掀髯

遊廣勝寺東巖

年來百念如寒灰老眼慵向時人開猶有愛山緣未斷  
芒鞋信步東巖隈東巖幽勝甲晉境寒藤枯木生蒼苔  
誰鑿雲根泄海眼驚波深瀉如奔雷衲僧具眼覩天奧  
作亭闢爾臨淵洄亭中空洞納萬象收奇攬秀無遺材  
倚欄清坐洗塵念灑然冰雪涵靈臺上方一目盡千里  
勞筋未暇窮崔嵬百年名刹燼一炬可憐金碧成蒿萊  
世間興廢豈足道會看穹壤論三災短生乘化不暫駐  
須臾變化隨風埃心知所歷皆夢境題詩漫識吾曾來  
下山一笑便陳迹但見白塔蒼煙堆

送孟待制駕之

渥洼龍媒天馬子墮地一日能千里月中折得最高枝  
回首銅駝荆棘裏學館淹留三十年白髮青衫誰料理  
否極而泰乃固然一夕天書墮窗几掃盡塵氛日月開  
金鑾玉署須英才萬言倚馬可立辦當使號令驅風雷  
長楊羽獵未要作丹宸箴規固不惡丈夫致主必唐虞  
太平勳業看真儒

題古幽龍窩圖

古木陰森山突兀下有千尋老蛟窟養成頭角儘崢嶸  
未得雲風且盤屈蝦躍躡相斬侮鼻息如雷正齟齬  
一聲霹靂飛上天普灑甘霖蘇萬物

息軒

黃塵滾滾平陽道去馬來牛幾時了小軒高枕謝勞生  
曠達如君今亦少窗明几靜無一事三幅黃紬擁清曉



富厚集卷一  
身如古廟瓦鑪閒性似碧潭霜月皎息之一字亦安用  
萬法本空人自擾都將此理付無言簷外秋風搖碧篠  
題劉光甫河山形勝圖

大河之源出崑崙伏流地中其水渾一曲一直九千里  
遠歷西域來中原龍門千古仰聖作兩山宛然疏鑿痕  
客舟萬艘付萬死蛟龍慘淡愁飛魂蒲關鐵牛駕長虹  
牛力不支一已奔東經茅津勢逾壯激石射岸雲濤翻  
首陽太華遙相望陝郊蒲坂俱名藩古來秦晉二大國  
恃此天險傳世婚三門河面天上落底柱屹立迎朝暎  
有如咸池濯日後梁公儼然烈言言客從西來憤登陟  
艱難萬狀難具論忽開橫軸坐見此破墨者誰留東軒  
國子先生不憚煩按圖尙惜遺孟門豈知河東有雄觀  
天橋落落居上垣河流拍岸政湍猛漸如蝕月鉤許存  
狂瀾俯首就束縛雖百雲夢以氣吞有時水底雷電擊

明朝數州雨翻盆上有層巒下重淵劍戟森然鑿鼓喧  
奈何河山真表裏水墨不沐詩人恩東徐呂梁周盟津  
五嶽更有它山尊祇知齊國有管晏不覺我亦如公孫  
君不見靈槎上天漢張騫貳師假途征大宛安得壯士  
挽天河一時爲君洗乾坤光甫初云先夫所畫止于  
關陝之間蓋素所見也馬祭  
酒子俊題詩於前又述孟門之險亦君之鄉也公當以  
火山之天橋繼其後各以鄉中之河山爭勝以此故畧  
云具

李進之迂軒

先生心古貌亦古干戈滿地冠章甫既不學敝裘季子  
佩印走六國又不學綠幘少年挾彈遊三輔一軒塊坐  
工績文庭院不知漂麥雨長鬚倚門私自語作奴莫作  
詩奴苦新吟初不療寒飢猶誦唐詩課兒女書生憐人  
不自憐以江濟水吾猶汝莫嘲醬瓿覆(玄)文焉知後世  
無子雲



獨遊清窟

溪水無聲巖樹碧古苔滿地花狼藉我來蕭散淡無營  
獨立看雲倚蒼石嗒然物我兩俱忘宛然枯蝸黏壞壁  
一聲唳鳥喚人歸隱隱殘陽下山脊

楊妃菊

漁陽鐵馬嘶函谷夜半青騾催幸蜀可憐倉卒馬嵬傍  
三尺生綃縵紅玉沈香花萼變荆杞燐走螢飛鬼宵哭  
妖魂一去復誰招脈脈餘妍託秋菊生前豔冶惑君王  
後身精靈鍾草木長生私語杳難憑萬古東籬怨幽獨  
瑤肌被酒暈仍在粉頰生香睡初足晚來涼吹動纖枝  
猶舞霓裳舊時曲當年傾國與傾城尤物移人詎爲福  
至今嘉蔕擅虛名徒使癡兒生愛慾秦川野叟妄習盡  
老眼看花如隔殼援毫未暇賦閒情且對南山吸樽醪  
答邊巨源

蹇子平生酷愛閒雅思臥雲對青山天公慊慵故相惱  
長使奔走塵埃閒塵埃蔽目世路險左機右筭行良艱  
長蛇磨牙蠱搖尾同人鬼域潛榛菅含沙射影期必中  
巧若羿彀無虛彎閉門久厭童稚聒如帶桎梏囚重園  
中宵好夢落林藪扁舟弄月清溪灣何時煙蘿一茆屋  
烹煮芝朮扶旭孱登危躡險筋力健追逐援狄窮躋攀  
振衣長嘯萬峰頂擾擾聚蟻悲人寰不然懷書叩閭闔  
薦引正直誅邪姦滌瑕蕩穢布新令坐使萬姓開愁顏  
惜哉兩事俱未遂向來綠鬢今華斑因君問我寫伊鬱  
臨紙老淚空潸潸

題戴嵩牧牛圖

儂兒生長清溪曲雨笠煙蓑一生足春風綠草滿汀洲  
千角吳牛隨意牧牧牛去來牧牛去往來慣蹋溪頭路  
溪深牛背穩於舟手掉荆鞭渾不懼畫師畫汝豈無情



羨汝安閒得此生讀書覓官祇自苦畢竟無憂不如汝

又諸君同賦戴嵩牧牛圖效閑閑體

東皋雨足沙草肥爾牛來思朝露晞或訛或鳴恣所適  
愛犢自是全天機阿童牛背吹橫竹聲入秋風斷還續  
憑誰采取笛中曲留與詩人歌考牧

弔李彥成二首

聖人立論誰能破善必降祥淫必禍先生高義眾所推  
抱病一生長坎坷太虛誰握造物柄報施如斯無乃左  
跖者回天使人疑欲問穹蒼無路可賴公平日道力堅  
洗滌萬緣惟宴坐心如古井自安閒身似空花儘開墮  
適來適去總翛然壽夭窮通甯計那我慙俗學未有得  
無恙頑皮強包裹不知旅枕寄邯鄲猶聳吟肩來飯顛  
茶然疲彼幾時休安得如公脫纏鎖一杯濁酒醉東風  
我弔公耶公弔我

天蒼蒼地茫茫紛綸人物滿八荒此身叢爾寓尋尺何  
啻一粒在太倉鳥飛鳥飛兔蹶蹶暮往朝來無暫歇百  
年倏爾寄須臾何似劍頭吹一吷富貴榮華都幾時九  
原冢墓空纍纍了知生死皆夢幻來何足喜去何悲近  
世誰人明此理河東通儒李夫子平生道學造精微真  
得南華骨中髓我初踵門來見公一談便契將無同公  
今乘化返真宅顧我猶在勞生中佳城鬱鬱荒山底一  
首挽詩聊爾爾撻蓬不必問鬪懷我信先生未嘗死

題甯戚扣角圖

星河耿耿天氣涼短衣飯牛哀歌長扣角一聲激清商  
永懷堯日依末光嘗聞巢父逢堯讓洗耳河邊掉歸鞅  
東皋雨足草連雲且與浩歌牛背上

贈李濟夫

結交貴以心相識不在面平生求友徧四方惟子始終



宮廡集卷一  
無少變世閒英俊達機權順世趨時若丸轉朝爲管鮑  
暮仇讎僅與市人爭一綫天乾地涸兩窮鱗吐沫相濡  
定何戀乃知道義未全泯耿耿交情久方見十年晉陽  
城閭盡輕肥兒賞音一夔足紛紛徒爾爲何以持贈君  
千載青松枝願君保貞心勿逐時世移

贈王壽之

髯兄少日人中豪文章談論天姿高讀書萬卷更讀律  
掉頭不肯爲蕭曹一行挾策作舉子紛紛憂患如牛毛  
晚年欲學柳下惠屈身小職甘哺糟我謂髯兄君勿恥  
向日都非今日是早知刀筆勝儒冠不向寒山翻故紙  
文班揚馬行顏閔餓死蒿萊竟誰問一編城旦作梯媒  
篋有黃金腰有印

韓邦傑清音亭

青山四合如圍屏下有百折流泉鳴泉鳴非宮亦非徵

中含太古之遺聲今人好今不好古此地久曠無人爭  
勸農使者有高超居官不爲官所撻游心雅在塵垢外  
茅亭巧構臨寒泓空山夜寂秋月明耳邊淙淙復琤琤  
初疑庖犧五十絃之瑟又類女媧十三篁之笙絲耶竹  
耶兩莫辨但覺灑然境與心俱清迺知山水中閒元有  
自然之雅曲不待五音六律足以移人情伯牙已矣不  
復生水仙一操空留名爾後惟有漫郎得此意南澗水  
樂千載無虧成九原英靈如可作相邀徑上清音亭一  
樽濁酒聊同傾

薦士

爲希  
晏作

崑崙駭浪從天下魚躍龍門爭變化誰令鯁鱗作威福  
無翼黃金飛半夜豈知林壑有佳士偃蹇蒼煙索高價  
竹花不實甯飢死腐鼠區區謾勞嚇薦賢有墨賴誰磨  
撫劍悲歌駭鄰舍擬欲排雲叫帝闈守關虎豹令人怕



知君學道深履踐①德今爲二程亞素衣不染洛陽塵  
凜凜高標齊太華優游諷議大官側餘論齒牙當一借  
異時安石起東山鄙夫敬爲蒼生謝

城頭曲

長安城堅鐵不如女牆隱隱凌空虛萬夫運土千夫築  
朝完暮緝良勤劬詰朝魯箭飛輕羽半夜貔貅散風雨  
自焚一炬更可憐不見重樓見焦土百年人事等閒休  
殘日荒煙動客愁壕中春水年年綠時有漁郎擲釣鉤  
雪谷早行圖爲鄧彥清賦

鄧君北來自汾水遠寄故人書一紙手持雪谷早行圖  
邀我題詩借褒美我初少年酷愛山夢裏見山心亦喜  
有時杖履遊山閒路轉峰回興無已一朝四海風塵昏  
拋擲田園竄荆杞窮冬蹋雪過南山玉樹瓊林一千里  
蹇驢破帽畫圖中忍凍吟詩飢欲死天教漏網盡餘齡

否極而亨固其理長安市上酒如川日日醉眠呼不起  
黃紬被底有華胥深怕南山來夢裏還君此圖君且止  
渡水穿雲吾老矣

送長源李弟西歸岐陽

秋風落落關樹遙秋河耿耿晨星高比鄰誰家剪刀響  
遊子一夜歸且勞人間畏途足風濤長裾何適不自豪  
秦中舊遊若相問爲我鄭重今繞朝

含②殿謠

南山蒼蒼渭水黃含②殿上春草長鬚頭野老駕羸特  
曉犁耕破宮中牆宮中行人屢回首西望長安小于斗  
喧喧車馬鬧紅塵畢竟幾人金石壽

寓庵集卷一



Blank page with vertical lines for text.

# 寓庵集卷二

五言律詩

過白嶺華嚴寺

按行來北嶺弭節過茲山野寺斜陽裏鐘樓古樹閒入  
門流水細獨坐老僧還共倚闌干望翻憐白鳥閒

七言律詩

送徐子方郎中

劍外方屯十萬師運籌帷幄要英奇人材惟有徐孺子  
士論共推劉穆之雲棧路危休叱馭錦江花好賸留詩  
廟堂正闕經綸手旦夕除書下玉墀

送鮑郎中

干戈一息指南陬正是男兒報國秋趨走蘭墀雖密邇  
笑談油幕也風流霜巖岷嶺朝揮策月冷巴江夜泊舟



南斗妖氛須快掃早傳吉語到中州

送李郎中二首

傾蓋相逢甫隔年驪駒聲裏又離筵人生聚散真無定  
世事翻騰亦可憐顧我分無蘇子印贈君聊舉繞朝鞭  
東州耆舊如相問爲說昏昏只醉眠  
世路風波日益深權門尊嗜老難任勞生笑我淹黃卷  
待士承君吐赤心五載感恩空有淚一詩餽賸愧無金  
翱翔臺省應非晚猶覬飛章起陸沈

送楊郎中

西漢儒宗揚子雲遙遙華胄豈無人著書不得文力  
筮仕還居要路津已播仁風安四蜀更施膏澤灑三秦  
閭閻疾苦君應悉細草封章達紫宸

送李子玉郎中之大理

聖代兵威暢海涯英才奉命殿南陲莫辭路徑穿豺虎

要使功名勒鼎彝雨露行霑蠻境土人民初識漢旌旗  
捷音定逐春風至此看除書下玉墀

寄省部郎中高柔克

萬里秋風一鶚飛如君才器正當時蕭曹事業真遊戲  
孔孟門庭要護持疲馬敢思逢伯樂斷絃何幸得鍾期  
桑榆景迫身猶健異日須酬國士知

送徐郎中之蜀

獵獵霜風捲旆旒一鞭行色指巴川軍中正仰裴丞相  
幕下仍登魯仲連已辦運籌臬逆虜不妨橫槊賦新篇  
凱還定在春前後此看除書下九天

送金郎中

一杯濁酒送君行莫聽陽關墮淚聲男子致身須富貴  
古人刻意只功名休辭蜀道登天險要使蠻方指日平  
奏凱歸來應不遠梨花樹底醉清明



送楊煥然赴召秦中兼簡

已為鱸魚早退休未容野水寄孤舟衣冠北渡無多子  
詞賦東原第一流天護漢儲留甬里人瞻秦府是瀛州  
花時爛賞龍池罷因過清門覓故侯

送高雄飛北上二首

簡在王庭早歲知到今恰作送行詩元無貢禹彈冠意  
政似毛生捧檄時司馬且依東道主驚猿毋效北山移  
他年經濟功名了歸養雞窠亦未遲

鶴髮能抗鶴書鄰翁力疾勸脂車情知大器無近用  
還媿清溝映濁渠螢雪不孤稱武庫風雲應也護儲胥  
鳳兮既上人爭覩鳳高名豈望王門但曳裾

送宋文卿北上二首

聞道營田得力來河南五稔佐行臺積成紅腐饒軍餉  
放出黃雲掩劫灰已見鸚鵡為地好此看鸞誥白天開

長裾戀戀爭先祝領得春風早早迴

虎豹休憎上九天含香曾近御牀前暫勞櫪下追風驃  
一作安用人閒使鬼錢自古郎官猶宰縣至今員外也

去聲屯田歸期政把黃華酒便與經營到百船

送宣課粘合正卿北上二首

黃色眉閒一點嘉北風驕馬歎龍沙春秋朝會新王命  
文武衣冠舊世家綸綍自分卿月掌斗牛須問客星槎

歸期定在春前後一作高著桃李重開錦上花  
英才教育人皆樂獨愧皤然兩鬢絲樹映階除真有子  
門盈庠序豈無師何時賓閣東開日政值征車北上時  
記取仲宣遙望處未歸頻讀送行詩以正卿新請教

送石子璋北上

滄海橫流不見邊徒杠石倒賴藤纏何人解補中原道  
老馬重過敕勒川河朔賞音依舊好趙州詩句斬新鐫



東垣儘有磨崖在更看繩橋第二篇

送李德新北上

不躡槐華二十年靜中卻遂讀書緣共知驥伏須千里  
誰料鵬搏又一天有詔特超毛義檄更寒休計廣文甌  
此行要試經綸手好整巍冠入講筵

送張耀卿北上

旌車走徧太行東晚得嘉賓自幕中莫比草茅參國論  
已從橐籥補天工四時蔥嶺書年雪六月松林解愠風  
久識天孫機上石更休擎下斗牛宮

寄郝紹先外郎

天眷西平雨露偏賓僚妙選必英賢關中政仰蕭丞相  
幕下仍登魯仲連一硯寒冰草檄滿樓明月夜籌邊  
快須努力平逋寇青史功名屬少年

送劉謙外郎

少年錦帶佩吳鉤乍別庭闈作遠遊疋馬飄零天一角  
歸心搖蕩月三秋綵衣行遂親喜白酒聊忘去國憂  
明日關河邈千里為君重倚仲宣樓

神英劍李文

利器來從鬪國西澄波三尺白差差見韓詩埋花荒徼餘  
千載假手英材此一時持報私讎非烈士削平大難卽  
男兒莫教化作蛟龍去要看成功刻鼎彝

神毅劍楊子實出舊作崩維差殺未門客彈缺聲中兩鬢絲

紫電青萍未易求天教神物耀中州匣藏惟恐寒蛟吼  
壁挂常令老魅愁高義幾人知季札孤忠千古只朱游  
願君勳業超前輩穩占凌煙最上頭

送宋大使

四海疲民未息肩九重聖主正思賢風雲適遇千齡會  
鸞鶴高飛萬里天願我尙淹原憲巷羨君先著祖生鞭



皂囊亟上安邊策咫尺除書墮日邊

弔平陽崔教授

三絕韋編老不休力窮聖學造深幽胸中拍塞書千卷  
身後淒涼土一邱生也有涯能幾許斃而得正復何求  
素車迢遞無由到灑淚題詩寄舊遊

弔郭器之二首

丁年聲價動文闈白首無成坐數奇筆掃千軍空自負  
學傳三篋竟何施黃壚樽俎驚前夢繡嶺風煙阻後期  
顧我平生心似鐵數行老淚爲君垂

獨騎瘦馬逐公侯誰念文園久倦遊百指煎熬真若海  
一官落拓亦何樓塵封錦瑟因緣斷骨掩黃泉意氣休  
平日英靈應未泯宜將至樂問莊周

弔紫陽先生

亂來人物久凋零一代文章獨老成謾說著書窮造化

可憐無位到公卿清風爽氣還靈岳賸馥殘膏丐後生  
誰割囊金刻遺藁坐令千載見高名

弔陳季淵

妙齡豪邁氣衝天萬里亨衢祖述鞭疋馬從軍纔幾日  
大昭挂壁已三年一場旅夢邯鄲枕四海詩名趵突泉  
八極神遊復何恨不須灑淚弔新阡

弔王君寶

桂折蘭摧不待年道邊空歎直如絃一朝寵命來天上  
千古佳城墮馬前無復賓朋過故里唯餘狐兔走新阡  
練裙嗚溼孤兒血誰草長書爲薦筵

弔郭好問郎中

萬斛鹹鹺隱禍胎臯羊肉飽玉鱗摧捨生取義雖傷勇  
觀過知仁亦可哀白骨銜冤無處訴蒼天有眼幾時開  
英賢取監元非遠覆轍應須戒後來



弔孟駕之待制

黃甲題名正妙齡心期平步到公卿忽驚日月天邊改  
竟使麒麟地上行一幅長書留禁坐千秋英骨闕佳城  
遺孤惟有西華在誰動當年故友情

弔遊商卿

世閒生死本尋常零落如君獨可傷千里徒勞懷故國  
一棺畢竟葬他鄉塵封黃卷因緣斷魂入青山怨思長  
平日交遊誰最厚道邊嗁煞練裙郎

弔塵公

方袍遊戲寓塵寰六秩光陰俯仰閒幻化色身雖有壞  
妙明覺性本無還雲來雲去天長淨花落花開樹自閒  
畢竟性靈何處在一輪秋月照姑山

送商宣撫東歸

陌上方傳五袴歌遽呼歸騎整鳴珂六年美政誰能繼

一片清明得已多秦國終難留士會齊人應久待鄒軻

高眠莫作東山計四海疲民要撫摩

送王大用都事之東川

激灑離杯滿意傾送君迢遞赴邊城紅塵鞍馬三千里  
黃葉關河第一程志節每因難處見功名要及壯年成  
凱還定在春前後鴻鴈來時早寄聲

送趙都事

玉音一旦落彤墀正直聲名草木知素抱皋夔匡國志  
適逢堯舜渴賢時榛荆蔽路須芟刈蘭蕙當門要護持  
九萬鵬程從此始一飛端擬到天池

送焦僉事赴闕

軺車遠自日邊來金節煌煌佐外臺威懾豺狼應膽破  
歡生田里覺春迴三年已展澄清志萬乘方思幹濟才  
比到皇州花正發除書宜對綺筵開



題同氏孝友堂

堂上逍遙白髮親堂前兄弟綵衣新一杯椒酒有真樂  
終日壘簾皆好春名教既無慚孔孟家聲端合繼荀陳  
殘年企慕心猶在早晚營錢去買鄰

遇仙橋

湛湛溪流浸古苔仙真相遇此徘徊一瓢玉液逡巡就  
七朵金蓮次第開雲海難尋歸去路乾坤惟有劫餘灰  
只應華表千年鶴會為家山一再來

海東青

朝對天東暮海西握拳一夕不沾泥眼涵秋水凌霜鷓  
衣染春風壓錦雞飛騎有門臨水放頭鵝無路與雲齊  
長楊掌上精神在未信而今首便低

劉彥朴索月旦評詩

亂後人才久混并誰能著眼向高明汝南莫詫先賢傳

陝右重新月旦評妍醜固難逃水鑑重輕終不離權衡  
卻防暗裏曹瞞至世上姦雄要指名

挽康唐鑑

憐子擔簦過鎮陽嗟予已罷紫薇郎秋闈舊入參軍夢  
秦和乙丑未試前有鄒公者老境重升達者堂同寓文廟故也  
夢康與子歲解既而果然一病到膏肓時危留得山濤在  
每論五行求子母忽驚一病到膏肓時危留得山濤在  
定保孤兒不負康

挽吳德明

憐君薄命重君才老腳初登郭隗臺三戰不支逢虎怒  
六駢俄去失龍媒漢家翻覆雲千里燕市浮沈酒一杯  
遙憶兩楹春夢斷英靈須到石州來一作全節卻從天付與非風不放鶴

來書

曹京父清暉亭

牆下溪流屋上山高亭穩著茂林閒波光雲影相搖蕩



雷庵集卷二  
谷鳥沙禽互往還已拚千金待賓友更分餘粟濟惇鰥  
人中曠達如君少鄙吝聞風亦厚顏

送太原鹽使徐進之

鶚薦初登北路徐王言褒美拜新除萬家自溢牢盆利  
一府行空訟歸書富媪孕靈真不負漕臺舉善果何如  
明年奏課魁天下晝錦煌煌耀里閭

卯瓶

鳳凰遺卵入青冥陶匠規模製此瓶夏繭結成渾具體  
秋瓜采得卽真形佩壺愧我無才思調鼎知君有典刑  
微物深慚瓊玖報願藏篋笥寶千齡

寄雷彥正監察

拂曉除書出漢宮憲司新起紫髯公從來不負將軍腹  
今日宜乘御史驄威懾豺狼應斂跡名喧臺閣自生風  
赤心報國從茲始要使家聲繼乃翁

僦屋

三十年居北斗城有家無舍可憐生每慚燕子營巢穩  
不及蝸牛載屋行一寸荒田無計得萬閒廣廈幾時成  
拂衣明月南山去高樹巢雲老太平

謝奧屯元帥就趙莊相訪

寂寞荒村客到稀山樵野牧共忘機忽驚天上黃金節  
來訪田中白板扉豈特鄉閭增慕羨便疑林壑有光輝  
他年父老談奇事親見元戎下布衣

寄竇子升學士

平水分襟四十年雲泥蹤跡渺相懸嗟予汨沒塵中老  
羨子逍遙物外仙聚首莫諧今日願論心更結後生緣  
三千里外無媒客北望題詩一泣然

上簽省相公二首

先世陰功被萬民天教繼踵出名臣胸中兵甲元無敵



筆底龍蛇信有神已把清名留四蜀又驅和氣入三秦  
金貂七葉從今始掌上驪珠已可人

虎攫龍拏得志秋世閒長物只儒流三更老雨盧仝屋  
八月涼風季子裘到處送人爲太守幾時騎鶴上揚州  
君侯有眼明於月誰謂隋珠是暗投

劍佩

劍佩揚揚入廟堂百年禮樂暗消亡惟應東海帆檣阻  
遂使中原草樹荒九鼎不移周社稷兩都誰讀漢文章  
青山綠水非前日滿眼清愁接渺茫

和姚尙書

蟻宮得意無多味蝸角追奔有底忙都把生涯付醪醖  
莫將行止問穹蒼山頭雨過丹青溼花外風來錦繡香  
嘯傲林邱聊自適不須尸祝擾庚桑  
寄張尙書

憶昔長安拜下風相逢相別大恩慙雲泥頓覺九霄隔  
魚鴈都無一信通幸已致身全富貴政宜垂手援孤窮  
坐令暖氣回寒谷盡在君侯咳唾中

清明有感

歲月如流老可驚此身更得幾清明吟詩對酒心雖在  
問柳尋花計未成壁上久閒靈運屣牀頭深負景山鐙  
不應後鳥山林性終向樊籠過此生

阿房宮

六國平來志益驕擬將宮闕壓前朝力營肯恤秦民苦  
勢盡還遭楚火燒月照荒城秋悄悄風摧落木曉蕭蕭  
土階三尺平生了長使人心憶帝堯

上張按察

地闢天開日月光政資耆德振臺綱威名久仰暴公子  
直氣共推王義方一夕清風生白簡千秋遺愛在甘棠



重瞳想調元手定逐春風入帝鄉

賀王按察以陝西都運使就改此職

丹詔飛來白日邊繡衣光彩照華筵平生素有澄清志

今日新操糾察權當路豺狼應掃迹得時鵬鶚正摩天

就中喜殺孤寒士從此依劉更幾年

贈鹿泉隱者

返哺烏嗥滿樹風迴頭一夢大槐宮致身寵辱虧成外

得味清虛澹泊中泉上猶存千歲鹿山中復見五噫鴻

東華縱有香塵在留與他人蹋輦紅

閱世

時危尊賤豈由天忽上青雲忽九泉腰下恰懸蘇子印

民間已罷鄧家錢紛紛世變誰能料悄悄羈懷實可憐

歸向老妻愚子說寒菹糲飯任吾年

劉彥朴贈紫竹杖

九節亭亭紫玉股寄來新自漢中山適從處士提攜後  
遠落詩人掌握閒雅稱穿花尋酒伴更宜和月叩禪關  
籠冠草履成三友林下相從伴我閒

送楊御史

霄漢雲收日月開澄清天下屬英才太平官府久不見

獨步中丞今始來宋江淹事草木氣蘇三日雨豺狼膽碎一

聲雷繡衣快逐春風去趁飲朝堂輓腳杯唐郭子儀事

冬夜不寐寄彥成二首

撥盡鑪灰覺夜長半庭殘月炯如霜枯腸政坐成茶祟

短夢無由達睡鄉不速自來詩易就欲收還去念難防

何時一擬襄陽老重叩南華學坐忘

半庭殘月晃疏櫺癡坐寒齋似冷蠅遮眼朦朧數行字

伴人岑寂一龕燈衰年漸與睡鄉隔妄念還依覺海澄

為報山妻莫相誚慙慙供養在家僧



題談子文秀麓軒

舊日城南尺五天，菟裘於此卜終焉。可人花木餘三徑，隨分風煙了一廛。朝霽得山秋更好，晚涼臨水夏猶偏。籃舁直候招呼去，人道淵明未若賢。

題商山四皓圖

鹿冠蓬鬢傲金貂，心與商顏夜月高。正厭鮑魚腥玉璽，更堪人彘污金刀。纒旣至幡然改羽翼，才能惡此逃回首。巖花幾零落功名一笑付兒曹。

渭水道中

鞭催瘦蹇蹋晴沙，路人青林一徑斜。翠巘倚空千萬疊，黃茅映竹兩三家。嘲嘲晰晰山禽語，白白紅紅野草花。卻喜太平還有象，叢祠春賽響琵琶。

題董彥才易簣戒子納書後

并序

退菴先生長于僕數歲，初以詞賦應進士舉，同試長

安其後會于陝，再會于平陽，故熟知其為人。蓋疏通周慎君子也。正大閒用宰相薦書補西臺掾，一時聲名藉甚。士大夫咸以遠大期之，惜乎遭值變故，胸中所蘊百不一施。齋恨九原良可悲也。然臨終方寸不亂，戒飭其子丁雷，明了如此英靈之氣，決不沈沒。亦足以驗平昔存養之功矣。今夫園冠方履，讀聖人書，往往自謂能窮理盡性，及一旦易簣之際，鮮有不顛倒迷錯者。聞退菴之風，能無愧乎？因作詩以道其事。

云

試手西臺便老成，吏才儒術兩崢嶸。干戈莫展平生蘊，山斗空留後世名。一紙遺書彰絕筆，千秋英骨闕佳城。誰言精爽從茲盡，月挂天心夜夜明。

送同周道之邠省，外祖鷄野先生。孔孟云亡道不傳，直從韓子到伊川。闡揚聖學三千卷。



振起醇風五百年正氣幾隨薄俗壞橫枝賴有外孫賢  
篋中亟發凌雲草莫待雷霆取上天

寄宋文卿二首

時在大梁屯田

堆鹽庭院夜深寒羅雀門牆晝掩關揚子素貧玄草在  
馬卿多病酒杯閒衰年涉世猶糊口往事逢人已厚顏  
明日登樓重回首五噫歌罷看西山

老思生入玉門

一作宋門

關賦更哀於庾子山洛下衣冠蓬

轉裏梁王臺殿黍離閒鵬搏想快三千里驥伏雷攀十

二閑魚雁不來空悵望滹沱冰合朔風寒

寄甯端甫

一別同年歲月深雲泥今日異升沈大鵬已展垂天翼  
老馬空懷戀豆心繡被擁香君醉臥蓬窗聽雨我孤吟  
救民自是吾儒事洗耳西風俟好音

寄孟玉潤

逢人問我驚猶在白髮蒼顏薜荔衣舊日情懷清夢斷  
故人音信曙星稀小窗梧竹知何處遠道風煙未得歸  
多感畫圖相贈與形容已比向來非

寄王百一二首

應教松林更著書體中春到又何如聽知人去須思汝  
寄得詩來已起予湛露固應勝醴酒秋風猶恐憶鱸魚  
北堂花外西樓月壓倒知章舊鑑湖

禾黍于今滿故宮草茅疇昔過新豐青衫歷偏人閒世  
白首翻成塞上翁有意坐依豚犬輩無方遠避虎狼叢  
略來炙背晴簷底閒著雕蟲戲小童

再用送邦彥韻道懷遠寄

憶昔班荆會鄧州何心託子楚之遊他時天上須開眼  
今日人閒只點頭老馬尚銜秦地草白雲猶憶漢時秋  
釣魚船上千行淚不爲清朝不得俟



趙景温還燕以詩寄梁都運

北來南去幾征鴻十載燕山在眼中邂逅相逢三語掾  
平安首問五噫公解貂貰酒誰家子擊筑行歌故國風  
落日黃金臺下過也應無處說詩窮

寄毛顯卿

華髮蒼顏兩病翁長因杯酒鬪英雄愛君真率如元亮  
笑我疏狂似次公轉首睽違經歲久幾時談笑一樽同  
昔人命駕輕千里咫尺長安在目中

寄從戒師李大年

窮居索莫少知音二老風流肯見尋妙藥時聞康子饋  
醇醪屢荷遠公斟南來嗟我計尤拙北望思君情轉深  
何日一尊重會面停杯細話別離心

含玄殿

巨棟層簷切絳霞昔年宮殿阿婆家雲埋蒼海將頽日

淚溼黃臺幾摘瓜劫火併燒還快意妖魂如在悔窮奢

區區一賦誇雄麗千古令人笑李華

咸陽懷古

庶齋老學叢談引此詩

連雞勢盡霸圖新兀兀宮牆壓渭濱指鹿只能欺二世  
沐猴那解定三秦倚天樓觀餘焦土落日山河幾戰塵  
今古悠悠同一轍不須作賦弔前人

過洛陽

恩多自斷殺身酬聞道隆中召武侯外禦豈期生內變  
後圖猶擬雪前羞鼎湖龍去九霄遠雪窖鴈來雙鬢秋  
慚愧詩人懷古意離離禾黍賦東周

長安耆年圖二十二人到今零落殆盡惟予獨存感歎  
之餘因題是詩

二十一人皆鬼錄此身獨在豈非天青錢不得龍頭選  
白髮空逾亥首年樽俎笑談良已矣畫圖形像只依然



此方諸老如差勝盼得昇平在眼前  
九日登成玄殿

萬壘南山翠作堆故宮登覽思悠哉清霜籬落黃花老  
紅葉關河白鴈來弔古莫沾襟上淚澆愁須盡掌中杯  
情知今日成玄殿壓倒當年戲馬臺

萬壽宮

傑閣雄樓映碧山藥畦蔬圃水潺潺軒藏修竹不知暑  
鶴與孤雲相伴閒見說兵塵連海外豈期蓬島在人間  
何時磨滅俗緣盡來向仙人問大還

寄徒單雲甫

山斗高名四十秋晚年始得上瀛洲胸中學問傳三篋  
天下英豪放一頭定有謀猷酬帝眷肯將藻繪混時流  
草茅亦抱陳忠志老病無階接僑遊  
別後寄平陽諸公四首

識字雖多不救飢遑遑此去欲何之季膺自合歸來早  
初子猶慙隱去遲脰管繁絃休入夢矮梅高竹政宜詩  
布帆無恙行人健預報故山猿鶴知

臨歧草草具杯盤綠酒雖傾慘不歡歲久始知交契重  
老來更覺別離難煙迷晚樹人初遠路入春蕪眼漸寬  
自笑平生聞道淺陽關聲裏涕洟瀾

一寸歸心折大刀短轅長路敢辭勞疲駑脫鞅精神健  
老鶴辭籠羽翼高詩社催科餘舊欠醉鄉閱戶有新逃  
到家恰是清明節卻拆紅泥對小桃

乍別親朋易感傷卻登高處望平陽深情密契三千日  
痛飲狂歌幾百場豺虎縱橫難再會河山迢遞永相望  
年年多少南飛雁莫惜音書寄兩行

通明閣

萬瓦鱗差壓秀楹李白詩今作魏魏層構類天成俯臨



曠野千峰小高與浮雲一樣平陸海風煙藏勝境塵寰  
歲月愧虛名茲遊奇絕真堪紀不負揚鞭過兩京

又

勢壓秦關百二雄層簷高棟倚晴空鳥沈落月蒼茫外  
身在霏煙縹緲中塵世自迷亡鹿夢仙山元有化人宮  
憑誰乞我飛霞佩徑上扶搖萬里風

王內翰挽詞

經師論議史臣才歷徧熙朝館閣來往事盡隨流水去  
高名豈逐泰山頽少微妖氣應何速滄海狂瀾誰與迴  
萃美亭前松柏恨夜臺何必就廉臺公死於秦山之萃  
美亭東州士夫將

送道者還王祖師庵

路入蒲關春草長終南歸隱祖師堂雲開絕頂諸峯小  
竹閣危亭五月涼華表鶴來塵世換山陰鷓去舊池荒

傷心最是乘風地秋樹蟬號月滿廊

蕭公弼鍊師生朝

遊戲銅駝不記春漆瞳閱盡世閒人詩中放浪陶彭澤  
教外風流賀季真九轉丹成聊應物五噫歌罷更憂民  
掀髯一笑南華老卻向逍遙說大椿

送蕭鍊師公弼赴北庭之召二首

誰使蒲輪下九天希夷政自日高眠白雲未信能留住  
青海情知也有緣今代中原猶汗馬古人遺戒若烹鮮  
衝風萬里龍沙雪好護一作囊書上細氈緣字韻又作  
珍重囊書上細氈自雲眷戀應

無計碧海瞻  
依也有緣

彌天四海俱曾召末後焚香待謫仙政欲燕閒談妙理  
豈專服食引長年山閒舊說通三顧履下今聞受一編  
應被佩觿童子笑不言白日上青天被作有  
送太霞真人歸崆峒



四十年來演道經世閱草木亦知名未騎白鶴遊三島  
暫駕青牛過兩京百舍遠來方願見五漿先饋不須驚  
崆峒聖迹依然在會看高風繼廣成

聞捷二首

天兵十萬擁貔貅西域妖氛指日收幕府方傳都護令  
藁街已挂叛臣頭聲馳朔漠三千里喜溢中原四百州  
遙想龍庭稱壽處百官齊捧紫金甌

旭日當空萬國明猖狂逆豎敢橫行轍中方展螳螂臂  
天外俄轟霹靂聲萬里捷音來隴徼一番喜氣滿秦城  
九重早下班師詔四海蒼生望太平

贈喬舜臣

君家鼻祖政龔黃曾屈牛刀渭水陽千古清名配蓮岳  
百年遺愛在桐鄉斷碑零落嘗揮涕賢裔風流此對牀  
試築高門容駟馬老夫猶及見諸郎

被檄鞫問典牧司盜羊

興定間

不用癡兒證父攘多歧何處覓亡羊觸藩笑我初無定  
窺岸憐渠不自量誰復乘田尋孔子大都在位負文王  
幾時鞭起山閒石寄謝金華人姓黃

挽石末參政

力守孤城今已矣徘徊不決豈栖栖只疑尹鐸能存趙  
不意田橫自殞齊百鍊寶刀輕出匣千尋鐵鎖竟沈泥  
山川故國浮雲外惟見年年水滿溪



寓庵集卷三

七言絕句

奧屯元帥北觀八首  
 飄飄旌旆過天山  
 管尾秦頭指顧閒  
 一夜千門傳好語  
 相公又著錦衣還  
 月戶雲窗窈窕人  
 舞衫歌扇一番新  
 賸拚桑落千鐘酒  
 與洗龍沙萬里塵  
 關河響動記當年  
 父老相呼拜馬前  
 遺愛至今家有像  
 不須劍佩畫凌煙  
 唾手功名萬戶侯  
 煌煌虎節照清秋  
 男兒到此平生足  
 只欠經營萬里舟  
 百年一夢寄南柯  
 到底榮枯較幾何  
 萬事直須將禮遣  
 不妨屈意避廉頗



清霜迤邐上華簪  
睚眦千戈苦日尋  
何似風恬波靜處  
白鷗相對兩無心

擇地休營綠野堂  
捐金莫買雪堆莊  
歸時處處堪行樂  
桃李清陰滿故鄉

燕雀猶懷賀厦心  
幾年青眼辱知音  
正山厚德將何報  
聊獻狂言當誦箴

劉伶荷鍤圖

荷鍤相隨死便埋  
生生死死兩悠哉  
長安陌上塵如海  
醉殺何曾為酒來

陳季淵參議作海青詩有修翎如劍斫雲開之句徒丹  
雲甫以斫雲公目之七首

妙齡聲價已摩空  
無數珠璣咳唾中  
今日真成管窺豹  
一斑時見斫雲公

腦脂遮眼困英雄  
裂月撐霆句轉工  
造物戲人良有意

大名將畀斫雲公

名高湖海老元龍  
百尺樓頭氣象雄  
千古英靈埋不得

三生重作斫雲公

遺山落筆坐生風  
惟許儋州秃鬢翁  
白玉樓成仙去早  
惜渠不見斫雲公

區區郊島兩秋蟲  
露溼螢飛琢句工  
若論橫空盤硬語  
何曾夢見斫雲公

七篇奇語播寰中  
千古陳言一掃空  
喚起騎鯨老仙伯  
也應首肯斫雲公

自從此老入關中  
百二山河勢轉雄  
我輩便當焚筆硯  
大家迴避斫雲公

題王講師虛室

道人方丈有天游  
一榻蕭然萬事休  
畢竟離朱窺不見  
季咸妄意測壺邱



江亭會飲圖

折脚繩牀老瓦盆絕勝騎馬五侯門江東李白詩無敵  
尊酒何時與細論以卷首有裕之仁卿二詩故云

送翟教授赴延安三首

才氣無雙信蜀珍幾年流落困黃塵腹中滿貯青箱學  
莫惜殘膏丐後人

魯邦雌小建芹宮濟濟衣冠在眼中莫道山城孤迥處  
溪邊亦有舞沂風

光風霽月滿南州一旦濂溪有北流但使遺黎入陶鑄  
坐令強獷變和柔

用郭外郎韻十六首

尋春重過曲江東爛熳繁華在眼中寂寞此心誰會得  
少年場上白頭翁

滔滔歲月逝波東往事迴思一夢中自笑平生喙三尺

老來翻作囁嚅翁

君才獨步陝西東筆落珠璣咳唾中跛鼈定難追逸驥

謾誇坡老和陶翁

細草幽花灞水東籃輿坐我畫圖中歸來酩酊無佳句  
良愧當年六一翁歐陽詩已到庭西逢太守籃輿酩酊插花歸

春衫貰酒畫樓東朱碧紛紜醉眼中  
坡詞我醉初不日暮馱歸驢背穩路人指笑是詩翁是趁題所逼致不探如此

嬌兒索飯泣門東不信疑塵滿甌中搜斷枯腸無好語  
生涯已是少陵翁

信有仙人碧海東玉樓銀闕瑞煙中為嫌上界多官府  
且向人間作醉翁

昔隨計吏走關東屢入宣和禁苑中陵谷變遷今幾度  
試憑銅狄問仙翁

丁年落筆賦河東曾入鴻儒顧盼中老去布衣誰比數



黃塵憔悴一衰翁

千古繁華逐水東銅駝埋沒棘叢中傷心欲問前朝事  
不見連昌舊老翁

一塵舊隱滸邱東千丈蓮峯指顧中早晚重尋遂初賦  
瓦盆沽酒伴鄰翁

春光淡蕩滿秦東亭已拚形容痛飲中排悶新詩隨意  
掃要將公案學涪翁山谷詩排悶有新

纔見旌旗出漢東復聞風火起湟中欲知邊塞征人苦  
請問新豐折臂翁

比年恩詔下山東百萬人家喜氣中一見昇平死無恨  
不差扶杖尾田翁

金鼓明年過浙東行人江上版圖中便宜條奏吾儕事  
勿謂無人繼弱翁

五雲明處日升東豪傑都歸控馭中為謝元和諸學士

莫矜相業笑漁翁

彥仁參謀袖攜房祖太極宮提點李廣道畫像并墓表  
遠來求詩姑題二絕以應命李號北山退翁

閱盡銅駝陌上人歸來高臥北山雲遙知夜半乘風去  
不受人閒馬鬣墳

太極重遊鬢已華承平日月記仙家種桃道士歸何處  
惆悵劉郎賦落花

庚子元日三首  
今日欣逢庚子年太平期在十年前早來似覺春光好

拂拂東風入酒筵  
窗前一夜雨瀟瀟曉起晴光淡碧霄百鳥不嘯風色靜

老僧來說好年朝  
每憶清朝元會日五更燈火御街前當時無限風雲意

今日僧窗聽雨眠



送亢公講主奉敕修白馬寺三首

經來白馬教初傳千載高僧續舊緣江北江南今一統  
至元遠勝赤烏年  
勝緣幸遇明天子福地還興古道場指日蒿萊化金碧  
人閒重覩白毫光  
凌雲古塔鬱崔嵬百寶青蓮次第開方便應緣心事了  
松枝回指早歸來

詞

水調歌頭

史侯生朝

轅門奏歸凱旭日上初筵東風萬家香火春信到梅邊  
側聽稱觴新語一滴願增一歲門外酒如川詔領八州  
督聲動九重天 茁蘭芽輝花萼樹堂萱一門餘慶如  
此今古幾人全多少山東父老久望太平勳業畢竟在  
何年整頓乾坤了拭目認凌煙

滿庭芳

莫德修生朝

燕寢凝香金貂貫酒挽將天上春迴踵門為壽盡道謫  
仙才誰識元龍豪氣沈雄自湖海中來十年夢新亭風  
景唯有歲寒梅 老來須共約鳳皇山太谷下竹杖芒  
鞋要從今澆下胸次崔嵬釀取周郎醇酎更休用桃李  
傳杯衡門外枯荆尙在干歲看花開

水調歌頭

張耀卿壽日

傷心庾開府書劍憶遊梁十年流落冰雪如履柏臺霜  
昨日螳螂當轍今日豺狼當路牛背置神光竟訪赤松  
去不顧紫微忙 漢貂蟬萬人傑八州王有君如是何  
事高臥北窗涼傳得黃州密印有病安心是藥此外更  
無方莫袖經綸手遺愛在甘棠

水龍吟

蕭公弼生朝

喜逢天上仙人一尊共醉梅花底朝元已了讀書未徧



復來人世憩鶴臺邊景龍門外十年遊戲自歸來卻過  
趙州橋上閣橋下東流水 盡道翱翔物外解牛刀  
遊餘地誰知別有香山遠韻謫仙豪氣應笑蹉跎半生  
書劍今猶如此待西風拂貂裘塵土進黃公履  
望月婆羅門引史尚書  
太平有象老人星喜照滹陽前銜會近文昌壽樂謹今  
年餘慶新到五花堂看雞鳴問寢鱗次稱觴 白眉最  
良八州督漢侯王院院瓊林玉樹畫戟清香一椿五桂  
更休說燕山竇十郎談塵上白石羲皇

寓庵集卷三

寓庵集卷四

序

蘭泉先生文集序

文詞君子之餘事古之人癯形苦心讀書以學聖人之  
道其志蓋本于輔時澤物見諸事業而已惟不達而窮  
奇才逸氣噤無所施往往自肆於山巔水涯友雲松而  
狎魚鳥至觸境感物發於嘯歌謳吟以寫其湮鬱不平  
之心好事者或得一章一詠諷誦不置直謂其胸中之  
所素蓄不外乎此噫是特土苴糟粕耳然自屈原放而  
離騷興子昂窮而感寓作下逮李杜諸人不可勝紀其  
閒英辭麗藻千狀萬態皆能聳動人之觀聽是以聲譽  
流傳至今故雖號為一藝而陸沈不遇之士舍此亦無  
以自見于世使後之人誠能味其言考其出處因有以



得其爲人則君子之志庶幾乎不泯矣先生資警穎不凡童卅已能詩比長學於六經仁義之道慨然有志當世身兼兩科四至庭試無何與有司不合乃結廬北山蘭泉之上日以詩酒自娛隱約林邱者殆二十年其純德雅望晦而益彰王公大人聞其名爭慕與之交會明昌下詔舉才行之士時右丞董公按獄關西首以先生應詔始得官教授絳州未幾召爲翰林應奉入直禁中與天章宸翰旦暮相酬酢其眷禮之優一時詞臣無能出其右者方欲登用而先生老矣力請而歸某愚不肖幸生長先生鄉曲幼嘗獲侍長者左右竊聽其論皆曰先生出太平多士之日行義修於家稱於州里信於士大夫卒聞於朝廷自非踐履篤實能如是乎有如早達得位與當世英雋頡頏於風雲之會其視古人之事蓋優爲之惜乎遭遇之晚弗克展盡底蘊使功業不白於

天下而獨以文辭傳此爲可恨中古以降鄉舉里選之法不行有國家者一以科舉取士雖賢公名卿閒由此途出至若潛道育德與夫抱經綸之業而見遺於有司空老蒿萊沈落光耀者顧豈少哉愚因究先生始終屈伸之際抑有感焉遂併書之以警後世之爲政者

恆齋先生文集序

士君子讀書學聖道得之於心發於事業以輔時澤物爲本所謂詞章者特餘事耳先生自幼力學挾策爲舉子藉藉有聲場屋閒其於吏事蓋不習而能一日爲故相莘公所知白衣擢西臺掾褒衣博帶進退雍容如素宦於朝縉紳諸公稱之不容口議者以爲登金門上玉堂行有日矣遽罹大變羈旅河朔者十餘年流離坎坷之際感物興懷有詩并雜文近百篇讀之使人悽惻不平於心噫如先生之德之才向使在昇平之世其雄



文麗藻足以頡頏前輩且事業必有大過人者惜乎賦命數奇遭時多故年與位俱不充其德其表見於後世者止於此有識之士所爲仰天太息也乃子敏之哀其遺藁藏於家將傳之子孫懇求序引不肖於先生爲後進昔嘗侍坐獲聞緒言矣故不敢以固陋辭先生諱某字彥才恆齋其自號云

雲巖先生文集後序

千霄之木其本必深朝宗之水其源必遠古今士大夫以文顯者鮮不自其家世學業本源中來雲巖先生才高學贍尤精於科舉南渡以來屢中高選時人莫不推服予自弱冠侍長者側已熟其名矣及至汴梁又聞其子駕之在場屋間賦聲藉甚爾後果以雄文擢上第觀其語意雖穎悟天出亦由過庭之際諄諄提耳有以啟發之也歲在庚戌予方客長安駕之亦繼來與之遊益

狎一日出巨帙且謂予曰先人往年著述頗多經變後零落殆盡僅存者止此而已大懼併失之使先人平昔力學之功不白於當世以重不肖之罪今將鏤木以行已囑諸老爲序子其爲我尾書數字是亦成人之美之一端也予旣辱與駕之友且嘉其在羈旅困厄中孜孜不忘揚其親之善弗可辭也已故爲之書庚戌五月日嵩陽歸隱圖序

孝不遺親仁不忘本昔太公封於營邱比及五世皆反葬於周孔子轍環天下而卒歸老於魯古人之於父母之邦眷眷若此者豈徒然哉圓冠方履讀聖人書而行或戾焉惟利慾有以汨之而不能自返也自經喪亂衣冠之士逃難解散餽其口於四方者多矣或欲歸而不能或得歸而不欲往往晏安聲利之場沈溺繁華之境玩歲愒日不知老之將至噫墳塋荆棘誰與剪除祖先



神靈誰與祭享死者無知則已如其有知能恻然無望於子孫乎霜露既降烝嘗既至使餒而之鬼風號雨泣於荒田野草之中雷不痛於心也哉吾友趙君朋舉業儒而隱於醫其先本澤人避亂渡河卜居於洛陽之登封父祖沒因而葬焉比遭大變留滯關中以河南地鄰敵境寇攘未息坐是久不得歸然首邱之念未嘗一日置也迺求名公繪嵩高於橫幅之上命之曰嵩陽歸隱圖庶幾朝夕瞻對以致桑梓之敬而自慰其心嗚呼可謂不遺其親不忘其本矣莊烏病而越吟鍾儀繫而楚奏君子猶有取焉況拳拳於仁孝之道如吾友者乎且吾聞嵩陽山水秀絕甲天下方今名卿儔老多買田築室於此以爲菟裘之計異時吾友東歸之日不惟得除掃先隴以酬積年之願抑又從諸公於水光林影之中一觴一詠其樂豈可量哉一旦酒酣耳熱出不腆之文

於樽俎閒將有默然而思惻然而感泣然而泣膏車秣馬逕還鄉里者矣

林泉歸隱圖序

汴梁蓋良臣以瘍醫鳴於秦者三十年矣自乃祖暨父三世以太醫奉上蓋素業也逮良臣而術益精其以砭臍療疾如輪扁之斲輪得於手而應於心如養由基之射百發而百中也往年從車駕南征吾軍乘勝塵鄂渚病者頗眾良臣隨大小救藥無有不愈上多其功所獎賚者甚渥仍有旨復其家今年逾耳順居闔閭閒如有所不樂慨然有拂衣高蹈之志乃命良工繪以爲圖目之曰林泉歸隱請予題其端予應之曰予知隱之道乎古之人懷奇負氣不幸出非其時鬱鬱不得志乃有憤世嫉邪全身遠害逍遙江海之上偃息雲林之表長往而不返者矣良臣有一於此乎予知其無有也夫隱非



聖人之中道如耦耕荷蓀之徒皆孔子之不取何哉以其潔身亂倫而果於亡世也且醫雖名爲一藝至於扶危濟困功被生靈有君子兼善之道焉自岐黃而降至扁鵲倉公華佗孫思邈之流皆有成書傳之不朽凡以此也今良臣挾先世已試之方時出萬金良藥往往脫人於死蓋長安城中不可一日無也乃欲韜光晦迹肥遯山林顧自爲謀則善矣其如病者何異時萬一復有如荀偃之瘍生於頭范增之疽發於背曹參之身被七十創關羽之矢毒入骨杜元凱之癭冉伯牛之癩與夫折脅摺齒之徒焦頭爛額之子負其疾痛日夜叫號宛轉於枕席之上者則孰與拯之哉況隱非一途也昔之賢者有隱於耕隱於釣於卜筮於版築以至監門卒酒家保無適而非隱也而隱於醫者奚獨無人藥不二價如韓伯休不求近利如宋清氏庸非隱乎故曰朝亦可

隱市亦可隱隱初在我不在於物子但專心致志益治子之術浮湛閭里潛心積德不求聲名固不害其爲隱也又何必高謝人間竄伏巖壑親魚禽而友麋鹿然後爲隱哉至元三年三月日序

王尊師泛霞圖序

道家者流其源出於老子大率以練氣養神爲本其言有曰氣者神之母神者氣之子神用氣而養氣因神而住積以歲月行之不懈神完氣固與道合真至於死生之變如屈伸肘坐脫立亡特遊戲耳此古之至人所以能湛然常存者也自鍾呂啟之於前重陽子及邱劉譚馬之徒繼之於後由是全真之教彌滿四海其間悟真機達妙旨翛然自得於往來之際者代不乏人今觀沖虛真人毛尊師又其猶異者也師諱養素字壽之道號純素子世爲姑射人自幼出家遨遊嵩華間遇無礙田



君盡傳其道值天興之變盤桓平水已而還洛陽構棲霞觀居之日與名士大夫遊如紫陽楊公煥然玉華王公元禮西庵楊公正卿相與爲方外友則師之爲人可知矣朝廷高其名因賜以師號未幾復隱華山洛中諸公具書敦請固辭不就一日忽謂其徒曰吾年已耄矣是宜早歸翼日味爽而起方理巾幘冥然立化享年八十有二嗚呼異哉非體性抱道隨物變化而不失其真者能如此乎近世以來未之有也弟子某等服膺門下積有年矣常恐先師盛德之事闕而不彰乃命工繪其像於縑素將求當世名公詩頌以光揚之其用心亦可尙已中統二年歲次辛酉中秋日古奉先李庭序

三老談玄圖序

古之人固有業異心同而相與爲友者在晉則陶淵明陸修靜在唐則李太白吳貞節是已夫友也者友其德也故德有所長而形有所忘至於一話一言皆相契合了不覺其狀貌衣冠之殊也寥寥千載代不乏人如吾鄉蘭泉先生澄軒王尊師其庶幾乎初蘭泉以學應兩科才行兼備爲儒林之冠澄軒王尊師以博極羣書德性純厚爲道教之宗一時卓然各以其所長顯於世蘭泉未嘗以習周孔而黜乎道澄軒未嘗以奉老莊而病乎儒聲氣應求天同神比祛不壖篋而和不膠漆而固矣松窗竹塢杖履往來或談窮理盡性之書或講專氣致柔之旨以致中庸大學之精微齊物逍遙之奧妙難疑答問互相發明聽之纏纏令人不倦剖藩籬於大方之家瀝淵谷於聖學之海及其內外一貫物我兩忘亦不知孰爲儒孰爲道也今二老仙去久矣高風遐躅凜然如在吾友黨公叔昔嘗從澄軒遊其懷賢尙德之心未始一日忘也近乃繪象縑素將徧求名公歌詠其事



以爲鄉黨之榮姑命僕序其梗槩云

長安五陵會序

按班固地理志云漢興立都長安徙齊諸田楚昭屈景及諸功臣家於長陵後世徙吏二千石高訾富人及豪傑兼并之家於諸陵其閒知名之士郭解陳遵原涉之流不可勝數率皆尙氣節重然諾振貧周急脫人於死而不伐其能其所行雖不盡合於正道而英風義概有足稱者然猶多以任俠行權獲罪至其子孫憑藉世業不知稼穡之難往往耽於佚游惟以走馬鬪雞毬鞠博奕爲事此一時所謂五陵年少是也今長安諸名家子弟生於千載之後聞其風而悅之若有意效其所爲者將鳩集朋類剖羊醢酒時時宴飲以快意於當年且欲以五陵名其會因韓弟邦傑丐子爲序引予竊謂諸公子皆懷奇負氣幸生長富貴中託父祖餘蔭得乘肥衣

輕飽食無事其爲福至矣縱不能折節讀書從良師友講求聖賢事業以爲將來致身之具則猶當視前世豪傑行事懲其所短就其所長而效之亦不失爲奇男子至於末流放蕩之樂年少嬉戲無益之事不學可也邦傑方從予遊旣來有請故不得不以正道告之冀歸語其儕輩使自擇焉雖然予老矣或慮之過後生可畏亦安敢謂秦無人已酉秋九月日序

重陽詔旨碑序

恭惟國家受天命一海內雖以武功平暴亂而尊德嚮道之心率皆出於至誠殆天誘其衷將使以清淨無爲之教仁黔首而階太平延社稷無疆之福嗚呼休哉自聖祖龍飛駐六軍於西域遣使萬里首聘邱公虛已溫顏訪以至道一時對揚之際<sub>玄</sub>言妙理仰合神機所以眷顧綢繆始終不替逮乎重明繼照追配前休化及宮



闡亦克敬奉由是湛恩渥澤涵浸玄門矣維重陽萬壽宮實祖師修證之地故朝廷注意爲猶重累年以來所受詔旨爛然盈篋真人某皆以耆年宿德爲一代宗師佩服德音懼有失墜今將刊諸貞石以傳永久庶幾後世有以知大朝崇教之意云

馮道人語錄序

道不可以言傳而聖賢必假言以明道蓋學者之求道亦未始不因言而入也老子列禦寇莊周之流深於道者也皆有成書以傳於世復慮後之學者旣因言以會道或不能體道以忘言故曰知者不言又曰知道易勿言難然則言者殆聖賢之不得已乎好事者集馮道人所言以爲語錄將錄諸梓託吾友郭周卿寓書平水來徵序且某旣與道人昧平生又不知其語錄中果何言但以周卿素誠信君子業已許之矣必非無見於道而

苟言者也單闕之歲七月晦日浮陽李庭序

大霞薛真人疏鈔序

老子道德五千言行於世者千五百年矣燦然如日月之麗天固不待贊古今注釋不啻百餘家顧淺深詳畧雖有不同至於發揮妙理啟迪人心要之皆有功於聖人之門者也竊嘗觀碧虛陳君所解中間貫穿百氏剖析玄微引證詳明本末畢備尤爲近世所貴然而初機之士開卷茫然往往猶有望洋之歎大霞真人韓奕薛公性純德粹問學該通號爲羽流宗匠執經講演垂四十年可謂升堂觀奧者矣迺於傳教之暇撰成科文義疏一十卷纂微開題及總章夾煩各二卷重觀縷蓋數十萬言意欲使學者泝流而知源因博以求約以躡梯蹬以陟九層之臺舉足愈高而所見益廣及乎造重玄之極致悟大道之強名體用兩忘有無雙遣超然自



得於筌蹄之外然後敬為此老拈一瓣香庶幾不負其  
平昔用力之勤也已書成既久祕而不出前耀州威儀  
美田白顯道再三懇請以平昔衣盂之資募工刻梓以  
廣其傳且囑僕為序引其心可尚故樂為之書歲在己  
酉仲冬晦日浮陽李某序

庸齋直解後序

聖人之道大而博固不可以一方求不可以一說解古  
今解老子者不啻百餘家其間互有長短人自以為是  
終不能合而一之各得其性之所近而未免有所偏也  
王輔嗣之注易非不高深然後世議者以為幽沈仁義  
罪過桀紂豈非以其言體而不及用舉本而遺其末即  
未免為不該不徧一曲之士與老子與易一而二二而  
一者也諸家之所解往往入於虛幽渺之域而不切  
事情此西晉諸人以清談廢事至亡國敗家而不悔是

豈聖人之過歟今觀庸齋直解發揮玄理之外又引儒  
書以為證辭簡而意明使人易解所謂體用兼該本末  
具舉比之諸家所得為多可以傳世無疑其友伍君定  
夫既錄木矣寓書於僕以求序引因以蕪辭贅其後庸  
齋薛姓微之其字華州下邳人幼年從事於科舉變故  
之後出仕河南南漕司已而退居洛西專以著述為事  
蓋嘗從文元先生講學深有得理性之說云

愚庵集解序

孔子作繫辭曰易有太極是生兩儀又曰形而上者謂  
之道形而下者謂之器老子之書曰無名天地之始有  
名萬物之母又曰有物混成先天地生然則聖人之談  
道如出一口甯有異乎故先達以老易為一又以孔老  
為不二豈虛言哉竊觀道德五千言大率以清淨無為  
為宗以慈儉不爭為用至於修身治國之道靡不畢備



自中古以來與六經並行於世而不相戾後世學者妄  
生分別道家者流以儒術為土苴吾黨之士以道德為  
虛無各習其習各是其是譬猶燕北越南之人嗜好不  
同言語不通至死不相往來吁亦惑矣安得圓機之士  
而與語道哉蜀士文子堂自幼業儒遭難北來寓迹琳  
宇蓋於方內方外之書無所不覽暇日取諸家注解道  
德經參訂得失集其所長斷以己意該貫融通不少偏  
執所謂體用兼明本末具舉真圓機之士也書成囑予  
為序辭以不敏其意益堅姑述所聞以塞命云

送荆幹臣詩序

才質本乎天聞見存乎人苟聞見之不廣雖負奇才美  
質莫能有所成也昔太史公以命世之才博極羣書而  
又南遊江淮北涉汶泗周覽名山大川與燕趙豪傑遊  
故發而為文章雄深雅健卓然為一代之冠豈無自而

然哉幹臣家世東營雖生長豪族能折節讀書自幼年  
遊學於燕夫燕誠方今人物之淵藪也變故之後宿儒  
名士往往而在幹臣日夕與之交得以觀其容止聽其  
議論切磋漸染術業愈精一旦嶄然見頭角遂為明天  
子所知依乘風雲出入禁闈積有年矣制司既立首蒙  
選拔躍馬從徒出使萬里之外聖朝威德之所及舟車  
之所至高山廣野通邑大都莫不周遊而徧覽焉亦既  
盡天下之大觀故其氣益充而心益壯攄幽發粹以昌  
其詩語意天出清新瞻麗無雕鐫艱苦之態駸駸乎作  
者之域矣非才質之美聞見之廣能至是乎今年乘傳  
來長安公務之暇日與當途諸公把酒論文不以不肖  
之老且謬惠然見過出示所為詩一巨軸披玩再三惟  
知歎服今事畢治裝將歸諸公皆有詩以餞其行不揆  
亦賦蕪鄙一首奉酬眷眷之意并為之序



虛靜子文集序

甲辰冬予與虛靜子邂逅於洛水之濱一談而契相從者累日其爲人純素謙和未嘗忤物邃於老莊之書而深自韜晦故人鮮知者至於養氣練神之術予又莫得而窮之別後凡再見於長安其名益高從之游者日益眾然察其言貌卑恭愈甚殊無一毫自矜意與夫形謀成光虛憍恃氣者固有閒矣予以此益賢之竊以爲非深於道者不能若是一日其徒何淵甫袖文一編過余曰吾師平日所至聚落如風行草偃不知其所以然而化雖正容悟物無待於言而隨機闡教迪人心其於一聯一詠亦有所不能廢日積月累已成卷帙今諸門人欲募工刻梓以廣其傳將使吾師之名垂於不朽予盍爲我題其端予應之曰夫爲道者以天地爲逆旅以形骸爲贅疣又惡用名且虛靜子體<sub>玄</sub>育德積有年矣

一旦形神俱妙骨肉都融將乘風馭氣與造物游於無窮其不朽者固在乎彼而不在乎此雖然師有善弟子欲光揚之用心至矣成人之美予不可以終辭虛靜子延安臨眞人名某安道其字十九歲出家傳馬丹陽之道於鐵觀王先生云辛亥重九日

寓庵集卷四



詩經卷四

且	與	蘇	王	武	主	本	辛	交	重	武	日
少	矣	誠	真	人	各	秉	其	字	十	武	出
大	武	之	田	心	至	矣	人	之	美	可	不
其	不	可	言	也	也	也	也	也	也	也	也
且	其	不	可	言	也	也	也	也	也	也	也



